

進賢縣志卷二十二

雜識

禡祥

兵革

古蹟

坊表

禡祥



天道有常運四時有常行禡詳者異乎常者也春秋書災不書祥示警也言事不言應貴人也人事盡於下天道回於上則人定可以回天而恐懼修省烏容已歟志禡祥

宋寧宗慶元二年庚申縣民產子首有角腋有肉翅面具三目有尾

元至元二十九年壬辰大水

至正庚辰甘露降

明洪武十七年甲子芝十本產於學宮前

永樂十三年乙未大雨江水漲舟行樹杪壞廬舍沒禾稼命戶部差官行恤

洪熙元年乙巳久雨傷稼命戶部蠲租

宣德八年癸丑大雨江溢漂民居巡撫趙奏蠲租

按院奏免工部坐派諸色顏料竹木鑄錢等項

九年甲寅獲白鵲於白田貢之是年大旱

正統五年庚申霖雨江漲沒早禾六月後大旱枯晚禾命戶部軫恤 八年癸亥野蠶成繭於縣樹雲溪生並頭蓮 十二年

丁卯堯城山生瑞竹一本三榦 十三年水災民乏食巡按芮

請賑濟 十四年己巳又大水芝生縣石柱

景泰七年丙子霪雨七月大旱晚禾俱稿巡撫韓奏豁秋糧

天順五年辛巳災三月民居殆盡

成化六年庚寅縣治生雞冠花如鳳是年譙樓災 十年甲午

水 十一年乙未瑞竹一本二幹生真隱鄉艾氏宅 十五年

己亥饑 二十一年乙巳大水閉城五日漂人畜甚多

宏治十四年辛酉大水免稅有差 十六年癸亥又水免子粒

十七年甲子大水

正德四年己巳大雨雹夏六月大水南鄉盜起 六年辛未正

月朔地震 八年癸酉自夏至冬不雨秋日晦數刻如夜見星

十一年乙亥民饑死者相枕藉布政陳奏停秋徵 十三年
戊寅水免夏稅 十五年庚辰正月至三月霪雨夏四月大水
免稅

嘉靖元年辛巳大水饑免起運米 二年壬午大水浸縣治
四年甲申饑秋免糧並差 五年乙酉大旱改折免米六月大
雨七月蝗 三十一年壬子又饑免稅糧 三十五年丙辰大
水饑免存留稅糧以九江船料贛州鹽稅補給宗祿 三十九
年庚申大水免存留糧差仍以贛鹽稅補給宗祿 四十一年
壬戌四月至六月大水冲决民田廬免稅秋糧 四十二年癸
亥大雨雹 四十三年甲子水免秋糧有差

隆慶二年戊辰饑巡撫劉光霽奏免秋糧又改折南京倉米是
年冬奏准行一條鞭法

萬曆七年己卯崇禮鄉生嘉禾一莖三穗 十四年丙戌大水
蠲賑有差是年甘露降仙鶴峯 十五年丁亥大水饑知府范
徠請弛長河魚禁予民 十六年戊子饑免秋糧有差仍弛魚
禁 十七年己丑不雨至秋大疫 二十四年丙申並頭蓮生
金良輔池一莖兩花 三十一年癸卯三月甘露降於縣北邱
溪里色如凍蜜味甘 三十五年丁未邑災燬民居二千餘家
三十六年戊申大水民饑死甚衆巡撫衛奏改兌折粟賑資
仍弛魚禁 三十七年己酉大水饑巡撫顧請蠲恤令周光祖

有遇災詩四首 三十八年庚戌地震屋瓦有聲 四十二年甲寅大水邑中饑邑人熊明遇建議改折是時巡撫大蒙王公佐惠綏通省邑宰錢公士貴詳議折兌之法西昌喻公致知給事畱垣具疏贊成南糧全折北糧折十分之五每石止二錢五分 四十六年戊午秋彗星見 四十八年壬子六月羅盤里凡塘水午時溢高尺餘次年癸丑金德潤登進士 泰昌元年十二月大雨雪

天啟五年乙丑芝生金進士廳堂倒垂葉交織風吹則動一十七片色白而淡紅士大夫俱贈以詩賦 六年丙寅田潦

崇正九年丙子潦 十四年辛巳大潦民饑是年撫按題請改

折南糧明年布政司經歷林之秀載穀七百石遍賑三陽北山梓陂等處

國朝順治三年丙戌夏秋大旱民饑 四年丁亥春夏大水斗米至銀七八錢民食樹皮殆盡 七年庚寅潦巡按趙公如瑾具題稍減正賦從之

康熙三年大旱禾苗盡稿民饑是年蒙免額賦十分之三 四年又旱地盡赤饑民遍覓食蒙縣申詳發賑老幼賴存活縣單騎履畝勘報是年蒙免額賦十分之三 五年秋災八分是年蒙免額賦十分之二 六年夏大澇河流一夕水湧二丈餘漂民廬沒禾稼縣申詳發賑蒙減額賦十分之三 九年秋大旱

民饑蒙免額賦十分之三又冬大雨雪一月高地深數尺低窪
丈餘道多凍死 十年夏五月旱至八月乃雨草木皆枯田地

顆粒無收米價騰湧民拾菱菜樹皮草根爲食縣申詳發賑穀
下縣存活無算是年免額賦十分之三 以上彙志 十三年甲寅

旱知縣胡鼎生褫冠跣足暴烈日中懇禱三日膚盡脫不雨自
枷其項署曰失職令某大哭於壇民亦哭俄大雨四境霑洽

十八年己未旱巡按安世鼎委勘題賑 二十一年壬戌潦傷

稼巡按佟康年勘題蠲賑 五十三年甲午十二月大雨雪冰

凍人畜多傷 五十五年丙申四月二十九日水浸縣堂七月

旱山鄉禾盡稿 六十年辛丑大旱早晚禾收十之一二 六

十一年壬午旱

雍正四年丙午潦傷稼奉

旨蠲免有差 十一年癸丑五月暴漲漂廬舍人畜無算七月

初九日縣城災

乾隆七年壬戌饑穀價騰湧石壹兩叁肆錢 八年癸亥潦民

食樹皮及觀音土巡撫陳宏謀奏請發帑採買鄰省米接濟本
府吳同仁發粟下縣檄令姚夢麟減價平糶設廠賑粥全活無

算 二十一年丙子十一月十八夜地震屋瓦有聲 二十二

年丁丑四月二十二日各山發蛟廬舍人畜漂溺無算 二十

九年甲申大潦四月水封城門舟行縣治至十月始退明年春

通賢縣志 卷三十三 五
高宗純皇帝南巡聞江西饑調江蘇巡撫明德查奏賑貸兼行
廣設粥廠全活無算 三十年乙酉潦勘報照例減賦 三十
二年丁亥水勘報題減有差 三十三年戊子水勘報題減有
差 三十四年己丑潦分別題免停徵有差 四十三年六月
二十三日縣城災 以上羅志 四十八年癸卯大水

兵革

易稱王公設險以守其國又云公用射隼於高墉之上獲
之無不利蓋安不忘危古之制也進處豫章東南藩蔽攸
係我

國家承平百有餘年民至老不覩兵革然教民知義親上
事長不必在有事之時也元明之季解悖卽戎高曾之矩
義勇之風可無念諸志兵革

漢高帝六年潁陰侯灌嬰以兵定豫章郡過進今師過渡掩軍
祠其遺跡云師過又云伍員
南梁黃法甌討余孝頃兵過焉

宋建炎中王虎駕巨舟欲陷洪州縣民傅安民力戰擒之

宋末元將都木觶過縣撫州都統密祐迎戰龍馬坪三日死之
元至正十二年壬辰紅巾賊圍隆興熊釗樊復舉義立寨阻太
湖以守北山屢出奇勝賊又羽書告城併力夾攻圍解是年紅
巾陷縣城行省委脫歡員外復之縣民萬俊可招定有功脫歡
欲殄餘民俊訴免是年又有鄂萬戶自餘干率衆破進賢行省
遣蘇千戶領兵克復未幾又陷五月行省左丞亦恰眞班統北
軍自信州至進賢鄂萬戶戰敗走死遂復進賢委行省都事橐
歡水軍千戶辛敬守之十八年戊戌徐壽輝僞平章陳友諒率
水兵戰艦千餘由九江乘風一夕薄隆興火徐赤棄城走守進

賢縣橐歡辛敬以城降

明正德六年辛未撫州賊起地方爲所蹂踐後狼兵討平之民
被兵擄掠者甚衆十四年己卯宸濠叛縣令劉源清鳩衆拒
守濠妻黨婁伯來說降劉執而戮之其黨有逸出境者每爲誅
之由是東路遂絕濠兵未抵進賢

嘉靖中花園賊起四出擄劫臨川縣典史丁擒滅之立花園巡
司以上聶志

崇正癸未逆闖遣渠李顛率賊兵破邑城焚掠一空發大學士

傅冠祖墓羅志

國朝順治戊子大將軍段固山率八旗兵討金聲桓旣克師潰

過縣城 羅志

康熙乙卯大將軍率八旗兵討耿精忠駐縣城三日戊午大司馬江西總督董衛國率師討耿逆餘黨於崇仁建昌駐縣城一日 羅志

古蹟

古人逝矣蹟存而名可紀名存而實足徵魏徵士之亭戴叔倫之宅千載而下與徐亭蘇圃繫人長思矧甘棠遺愛飲水知源亦士大夫所宜憑眺而興起也志古蹟

忠義去思亭邑治東一里爲知縣劉源清建今亭燬碑存亭內並樹孫中丞忠烈公永思碑 蕭志

楊林忠義去思亭碑記正德紀元閹權紊政江藩宸濠乘隙弄兵餌網幽密忠憤鬱陶歲丙子東平劉侯汝澄自饒之德與右遷進賢以邑邇叛穴思患預防親賢士以廣文謀勤校閱以修武備增險隘以固封守持簡靜以安人心越己卯侯將考績而醜孽蠢動分遣渠魁欲盡奪郡縣符而驅之于逆侯聞變嘆曰臣子以忠孝爲本受民社之寄而值其難何以生爲遂咨議于前太守萬公季崇憲副姜公士元楊公恭甫共築城爲死守計擒游說搜姦匿伏驍勇于要阨以待其來逆戚婁伯頌郡賊攻縣殲前徒數十擒婁伯等斬之因諭衆曰春秋傳曰大夫出境苟利社稷專之可也若俟命而行則

事去矣況亂臣賊子人人得而誅之乎吾固假軍法以從事若命出而有違者按此法監精忠報國旗于縣左積柴環室囑其下曰儻逆濠自來當背城力戰若事不濟卽焚之毋令汚賊手也衆咸感激思奮鄉之豪傑亦率其子弟應嚮赴援勢大振賊氣沮又用僞詔以渙衆志侯怒焚於庭而斬其使檄約旁郡舉兵勤王走啟於都憲王公聲罪討賊時協謀殫力惟侯與吉安守伍公時泰豐城令顧公民表之功居多俘未獻而侯以風憲召道出鉛山元老鷺湖費公迎至客次拜而謝曰東南半壁賴公保全矣侯初去時士民送至縣東垂泣曰吾民再遺噍類侯之賜也何以報之庠生顏經江滿等曰我侯別於此我輩送于此泣于此卽此建亭樹碑以志不朽可乎僉曰善適貴倖方爭攘侯功中止皇上御極功罪昭明侯以監察御史擢太僕寺丞士民咸以言適湯溪胡侯時章以進士同年故避嫌弗果又二載宣城吳侯性夫莅治凡期月敝革廢舉政通人和士民屢以言吳侯喜曰揚前人之美以勸後吾志也于是鳩工集材未終月而亭就吳侯題其楣曰忠義去思亭屬予記予爰述其概如右侯諱源清號東圃吳侯諱大本辛丑進士云

汪集孫忠烈公永思碑記公諱燧浙之餘姚人以巍科登仕籍二十年忠謹仁恕始終如一正德丁卯以簡命來撫江右

時逆藩宸濠潛謀不軌游食近邑屢擢大臣公至輒繩之以法軍校不率一無少假邦民始安旣而燔虐滋甚幾不可制屢書請抑不獲上聞有議者曰公之爲國爲民惟旣乃心而不獲自遂寧無見幾之哲乎公曰吾爲大臣不能爲國靖難又不能以身殉之平日所學何事若夫利害得喪天實爲之吾其如天何於是敕郡縣固城池廣儲蓄厲士馬分兵布要害若將他備者密聞於朝將俟命至而傾之而不虞其發之驟也先是憲副許公逵以逆藩罪狀已著請乘其未發而制之公曰事勢甚大彼盤踞已深睨有不利吾無以白旦夕且命下姑少待之一日以事至逆庭諸司畢集濠盛儀仗嚴兵

衛以待因諭公等曰吾奉密旨正嗣統舉兵北向事茲決焉毋相貳也公獨立不跪應之曰天子在上諸藩各有定分密旨其誰爲之吾不能以大義討賊而脇之以從有死而已賊怒甚且憤其發已之奸聲如吼虎遂令力士縛之許公亦奮起噴血而詈同遇害焉時正德己卯六月十有四日也嗚呼公之學可以濟時而未可通時公之德能庇乎民而不能以自庇豈其智之不足哉蓋其爲國爲民有分之不容易情之不可解者而不復顧其身之何如也皇上御極之初卽命官禮祭贈秩尚書謚以忠烈昭盛典也集時甫入齡已知頌公之德迄今二紀吾邑士民仰風節戴遺愛無異於昔時邑侯

橫江邵公莅政期月一新百度而于節義尤加重焉來觀于
京首以表章公之大節爲言且以予與公嗣編修陞同年同
館友也因屬爲文以記之予不敢辭因次其事垂不朽

新城碑亭在迎恩門內十數步後爲錢侯生祠

聶志

競渡亭宋末焦麗建

見下碑

江萬里競渡亭記焦氏始祖寬山西太原人中陳亮榜進士
仕至叅知政事出守江西没于官遂家鍾陵之橙柴林二世
敬三世沃相因居之至四世麗字公華文龍榜進士也元攻
宋急是年焚其居遷鐵爐坑之西岸下瞰軍山湖湖有灣名
競渡先生遊有感於中因作亭焉五月五日觀龍舟弔屈原

子平也適其時萬里過延而久之嘆曰地有是名亭因以作
豈偶然哉予請得而述之夫亭以競渡作者斯時旗招鼓擊
挽子平之魂也低唱雄歌叙子平之事也迎之者錦色紅黃
祀之者酒香遠邇平何以得此哉忠愛激人心也雖然汨羅
之魂可能挽而到軍湖之上強楚之事可能叙而爲今日之
情耶是平有千萬世之忠憤楚不知而水知之先生有千萬
世弔平之悲楚與水皆不知之惟競渡之亭所以表而出之
也

飛昇亭在麻姑觀包真人飛昇處天順間建亭其上

聶志

仕學亭儀門左偏

思樂亭在儒學泮池側明天啟間建

寶氣亭邑治西今廢

魏亭以徵士名邑治西三里 以上聶志

趙時福魏亭記魏者徵士姓也亭者顏師古註漢書云秦法十里一亭停畱行旅宿食之館進賢古爲鎮宜有亭古之爲亭者必取古跡爲之杜預註左傳凡地名下多云今某所有某亭如盟於唐會於清有唐亭清亭此類非一也以徵士之賢故以姓名亭若郡之孺子亭徐賢亭聘君亭亦斯義也故縣舊有景魏堂尉廳亦有三賢堂皆本徵士也嗟夫其生也上能致有國者徵召其歿也下能使百世之後其姓與邑俱傳非偶然也居斯邑者不必以失其名爲恨獨當思其所以致此之由反求之吾身苟不自植立與草木俱腐豈不惜哉語曰見賢思齊詩曰高山仰止

嘯臺邑治北

聶志

包希魯嘯臺記龍興路判官兼領水軍千戶大梁辛君好禮平亂之二年作臺北山之龍岐江西行中書平章政事道童公扁之曰嘯宣其志也北山踞郡城之東有輔車唇齒之勢地險在焉臺以備譙望謹斥堠非爲遊觀也其上爲亭附祠死節之士激勸係焉當淮蔡之兵相挺而來南逼豫章四方久安承平戎政未詰而豫章省鎮所葺蔚爲重藩旁求人才

通賢縣志 卷三十三
以濟厥猷君適以道州錄事判官待期于郡遂守東門以智
勇退敵能各用彰守安公謙以君嘗尉進賢大得人和言於
上官因承制授君縣尹以往君單騎湖上以糾義兵民咸來
趨與水軍千戶定住了靜連兵相援鼓勇以進殺溺萬數功
狀上聞陞郡推官一年之中戰數千合焚舟千計勢乃大戢
自盧濬至于鄔子延衰屈折殆二百里咸置斥堠間諜潛通
復大敗之于大勝岡而江東之民日益來附適丞相奉詔南
征知其勲烈賜以飲器奏兼水軍千戶仍令安集進賢巨黠
夙兇牙栴復萌卽株剗之兵後年凶拊煦疏剔以養以恬郡
城北東屹爲藩援時都昌餘千殘栴未殄爲官民患斯臺之
作以虞備也夫定難以功崇功以志志帥也志銳氣勇功由
以成平章公之名臺厥有旨哉昔在劉琨長嘯郤敵人有弗
察謂以暇整流爲虛談嘗稽之傳嘯者蹙口出聲以舒憤懣
之氣也蓋忠溢肝膽義切精爽是以憤鬱於中聲泄於外剛
大之充於一體者其氣橫六合而吞萬象矣矧以秉節事君
仗義討逆又豈不足以褫人之魄者哉此君之所以成功而
平章公之得其志也君世宦族有聞人讀書工文辭忠義之
氣蓋有所積也

寓閣在治東棲賢書院後今廢

見下碑

饒仲寓閣記進賢之東七十里許曰潤溪有山巋然左右翼

舒前峯對拱環峙若繡溪水東注縈紆迤邐北匯鄱湖蓋鍾陵之奧區也唐時戴公諱叔倫者嘗卜居焉戴公以潤州人歷刺饒撫兩州多惠政宦成而隱居此地後人遂名山以棲賢川以潤溪云舊有書堂宅第數圯數振迄今鞠爲榛莽有年矣今邑令黃君行視鄉亭至其遺址慨然議興復而會金孝廉之有意也遂有屬焉令君捐俸廩先之鳩工助緡則孝廉與二三諸生率之而俾其耆頂金秉赤萬鳳等董之邑士民及餘干之西鄙若東鄉之北鄙願効財力者糜至不浹歲而書院竣事以報令君令君喜而記之孝廉輩又謀所以恢書院之處表令君之澤者復於學堂之後創一高閣夾室修

廊堤唐山廡繹聯前舍不僻不喧學士雲集絃誦不輟弗管蜀郡穎川之化矣孝廉議欲榜閣曰寓庸寓庸令君別號也乃令君固謝不居而重違其請則曰昔戴公以隱寓而吾以仕寓無已則名寓閣可也於時令君方以治行第一徵爲儀部郎且行矣士民又欲勒石垂遠徵文於余余嘆曰大地之勝豈不以人重哉溪山之流峙於地形者萬禩而以戴公得名乃今又以溪識戴也戴公往矣又將千載而溪山在焉昔何以岑寂今何以崢嶸昔何以不屋今何以累榭則令君之敎功也令君舉廢興利百猷鼎新於茲地猶所鼓舞則是閣也戴公之所寓神令君之所寓意也自今而往寓目焉則北

望匡蠡南視嶺表顧瞻我里毋忘前哲寓跡焉則朝蹠灑淑
夕躑翠微如憑虛御風翛然自適寓志焉則高山仰止架度
斯存可以驗文章可以考政事夫然故閣足永也蓋無寓而
非道也善乎令君之言曰得其趣則寄寓皆真不然雖真亦
幻也有味哉余聞閣之著名者莫如吾郡之滕王閣及讀三
王昌黎所叙記特言其景物之美可備遊宴耳閣中帝子無
述焉而垂之百年不可湮滅今神意所寓百倍帝子其必傳
於後無疑也雖然棲賢潤溪以戴公重山川也書院寓閣以
令君重戴公也而後之人承叙萬年永觀懷德無忝前人以
爲令君重余不能無三致意焉其閣延袤歲月工費士民姓

氏具碑陰

樊良樞寓閣記距鍾陵而東七十里爲棲賢山唐刺史戴叔
倫所棲逸處也戴公有明經堂舊卽其遺址祠戴公爲書院
接武金剛寺歲久荆榛入於民間武林黃公貞父先生來宰
敝邑夜宿潤陂聞古寺鐘聲乃披林莽跡戴公遺地集門人
金孝廉德潤偕諸生數輩登眺其上相與弔千古之代謝而
歌戴公清流碧山之詩劃然一嘯林谷傳聲慨然復古書院
民亦子來釀金成之題其枋曰棲賢畱勝歷磴尋尺而上成
堂三楹仍明經舊題而其後構一傑閣閣之後顏以小天台
亦仍戴公舊名也山川之勝此閣可凭而盡工竣先生爲書

院記甚詳余友金德潤徵余文以記閣諸生欲置先生於百尺而先生謙讓焉乃仍高戴公座而字之曰寓閣古今等寓耳先生寓而政且寓而情予亦從先生寓而目請爲先生寓言之予惟古之人柔心應世而雅好所託超然塵垢之外故累心俱盡而此中真意獨以元對山水得其趣則太虛爲室可以麾斥入極無所不至不得其趣而捷徑終南假步北山卽山川奇麗秀絕之氣不爲吾有此詎可令戴公見者戴公爲中唐名士有節概先後刺撫州饒州所在有惠政而棲遲此山三十年方其三仕之日輒寄慨於買山未得諫獵非時及烟霞而欲歸逐浮雲而笑晚其意固已遠矣至其真是非於漆園忘憂情於塞上清溪碧山踏花醉月白雲黃葉結陰寄禪此真與道浮沈者也貞父先生以卓絕名流作吏卽有阮嗣宗東平之趣於棲賢若宿世緣間一曳屐卽有勝情壇石政平民治百墜廢舉其非譽利害日代乎前如江上風濤山間烟雨曉夕百變怡然接之青山數螺溪流縹碧欣然有會其所以寄託者深矣昔蘇子瞻倅錢塘歐公屬以西湖僧惠勤三日訪勤於孤山之下抵掌而論人物勤曰歐公天人也人見其斲寓人間而不知其乘雲馭風懸五嶽而跨滄海也雖江山之勝莫適爲主而奇麗秀絕之氣常爲能文者用西湖蓋公几案間一物耳貞父先生振衣千仞激流萬里飄

通賢集卷之三十一
飄有世表意而吐納風雲襟絡海嶽今且矯翼天路用以爲儀則先生眉宇之間有棲賢也豈簡文所稱謝安石與人同憂與人同樂者邪子瞻爲西湖長後一歲率四五夢至西湖上先生一往有情情境發於夢想卽不可知然是閣也戴公得先生而傳其盛棲賢得先生而成其高先生功德與言自爲不朽予言不足爲先生重也聊以記夫閣而已矣

唐撫州刺史戴叔倫宅在邑東棲賢山後改爲書院

羅志

今廢

宋直寶章閣羅必元宅在邑東

聶志

徐鹿卿北谷記魏亭東六十里曰楊橋羅君亨父居之良田數十畝泉流灌注不竭兩山翼左右窈然而深君暇日經邱

尋壑顧而樂之卽兩山之口堰水爲長川夾川雜植花木北爲花島又北爲書堂前揖嵐山五峯隱隱出水上如筆架環堂種竹萬箇挾以二亭曰駐春曰專壑稍折結竹爲龜亭在蔽虧間其西臨池亭曰知魚巨鱗數百與人意狎聞擊欄聲則駢首出就餌若有期約者半嶺素梅環立亭曰駕香攀援而上高絕處亭曰更好秋涼澄霽登亭北望康廬諸峯隱見於微茫杳靄間烟昏墨淡莫可摹狀羅氏族蕃以林獨君素貧方其披榛剗翳自出意匠某所可亭某所可檻胷中有成屋矣而力弗及於是舉族不謀同詞隨所位置各出力以治其一而西南北之亭榭畢具惟東山居高面勝其下疆理或

他屬越十年始一之遂負山作精舍面三峯帶橫川人行鏡
中隱几可見旁闢海棠洞與花島相映帶總名之曰北谷君
芥視外物自嘉定辛卯經始距今五閏在官之日少居閑之
日多時時與親友幅巾藜杖酒壺茗椀徜徉其間折芳弄流
命席就蔭或焚香兀坐靜觀本心消遣世慮陶然不知日之
既夕其觸景遇事一發於詩清曠勁健務入於理歲在丁亥
予與君偕調官中都執手論心恨相得晚既別爲鷄黍約踰
年踐言相與上下山光攀翻草樹君奮髯傲兀自歌所制四
時詞二兒垂髫膝下牽衣和之別去予赴七閩帥幕再更春
而君實來顧念昔遊恍如昨夢君間語予曰士君子當出則

思處吾非惡乎出也出制於時處由乎我北谷者所以必其
在我也既不能隨波而俛仰盍亦退處于人之所不爭獨恨
饑來驅我欲遂放于寬閒而未能方將痛自損節增一室于
東山之下而歸老焉子其爲我記之予不敢辭夫素行足以
糾宗族忘機足以信禽魚推而放之時止時行又何間乎廟
廊之與江湖噫嘻佩玉瓊琚不利走趨亨父隱矣天降時雨
山川出雲亨父隱乎君名必元字曰亨父第辛未進士今爲
福州觀察推官云

趙汝偵宅在待賢里

黃時中宅在恩榮里

包希魯恩榮里記邑治右五十步曰少府橋由橋南又五十步至何嘉山前松江府教授黃時中可翁居焉年七十今天子尊禮老臣與庶老之高年者國老賜幣庶老賜帛有差時中凡再受賜始降玉色官綺越三年復賜金織二花紅錦時監縣爲高昌袁州海牙君伯源以時中重膺恩賜遂卽其植垣揭版題曰恩榮里所以彰上德勵鄉井俾知所尊崇又著夫有德者之獲佑於天也謂希魯爲之記竊計進地百里戶四萬有奇而口則十倍焉其間固有仕而食祿者矣或罔克壽或弗際時迨沒齒有不霑寸帛者今百里內惟黃君以初秩兩拜恩賜非優于學懋于德未易致是也監縣之表厥里而復欲記之者豈苟然詔黃君哉過是里者其必致思而有得焉夫人君之尊禮高年見諸經不一也古之聖賢所以倦倦於是焉皇上卑服罄府藏之儲再爲天下高年賜苟爲國老者不忘補過之忠而有以裨乎衮職爲庶老者率其子弟以孝悌忠信勤身務本而不恩于有司則恩榮之被又豈獨高年而已哉

北源別墅邑人提點司楊龍偉構

病鶴巢邑人助教侯復構

賜樂園在邑治北邑人光祿卿楊峻構

石灘草堂邑人副使楊二和構

百川鶴圃邑人都御史張臬構

適園邑東門外邑人編修傅冠構

先春園邑人都御史張臬構

西溪別墅教授舒旦建 以上聶志

坊表

陸清獻公修靈壽志不載坊表尚闕修也然表厥宅里樹之風聲百世之下聞者興起臚之史策庸詎不為吏治民風之一助耶志坊表

清政坊縣治前明初知縣梁璧立以自期天順間知縣呂聲修以石萬厯間燬知縣周光祖修後復燬

開誠心坊在西隅明正統間知縣張冲立

布公道坊在東隅明正統間知縣張冲立

賢行坊在通濟橋東為明初王中孚妻女立

薦賢坊在邑治南里許洪武十四年知縣丁全立

製錦坊

仁壽坊北隅洪武二年知縣梁璧重立

新興坊在邑治東百步放生池側

大成坊在儒學泮宮前

鍾秀坊在明倫堂前

泮宮坊奎璧聯輝坊俱在邑治南數步正德間知縣劉源清為

修撰舒芬會魁萬潮立萬厯間知縣毛一瓚修改題狀元坊後復燬知縣周光祖復改題三元全盛天啟間知縣梁應材重修改題名世同登一列鼎甲元魁名一列厯科進士名

錦繡坊在水西門外元時爲薩天錫建

繡衣坊成化初知縣呂聲爲監察御史王朝遠立

三豸坊爲御史陳璉楊峻于大節立

承恩坊爲錢塘知縣熊廸立

迎恩坊爲封監察御史楊敬善立

解元坊爲庚子解元季源立

登科坊爲進士徐行立

文明坊爲辛卯貢士徐綱立

畫錦坊爲叅政陳謨立

進士坊爲戊戌科王建立

進士坊爲己丑科陳子倫立

攀桂坊爲辛卯科余顯立

擢桂坊爲乙未科進士熊淵立

昂霄坊爲癸卯科貢士白璧立

香桂坊爲貢士雷鼎立

青雲坊爲辛丑科進士傅端立

進士坊爲進士吳預立

登瀛坊為丙戌科進士周煒立

折桂坊為甲午科貢士周泰立

雙桂坊為進士樊靜樊鑑立

登雲坊為貢士周備立

翰林坊為檢討葉燦立

進士坊為辛未科李鎮立

聚奎坊為辛卯貢士趙溥立

登科坊為庚子貢士萬和立

登雲坊為乙卯科貢士熊僑立

鳴世坊為乙卯科貢士徐明立

聯科坊為貢士趙楷趙桓立

尚書里坊為尚書朱夢炎立

太僕坊為太僕寺丞陳雲章立

天下宗師坊為禮部侍郎萬浩立

大冢宰坊暨宮保大臣坊俱為吏部尚書萬鏜立

總督三藩坊為兩廣總督張臬立

兩京觀風坊暨兩院秉憲坊俱為都御史尚書傅炯立

少司寇坊為刑部侍郎朱廷聲立

世憲坊為楊峻楊二和父子立

崇德嘉功坊為副使楊二和禦滾濠功立

進士坊爲丙戌科張臬立

進士坊爲壬辰科曾鈞立

兩都諫議坊爲給事中何祉立

世登科第坊爲己酉科貢士汪深乙未科進士汪集立

宮保尚書坊爲工部尚書李輔立

司馬中丞坊爲兵部侍郎饒景暉立即舊清政坊址 以上聶志

進賢縣志卷二十三

雜識 瑩墓 寺觀 仙釋附

瑩墓

荒烟蔓草間身歿而名存者幾人九原可作吾歸隨武人亦貴自樹立何如耳志乘向有瑩墓一門以存往蹟也乃舊志所載自宋陶夢桂而下有不能指其地者數十餘人於義無取于事無徵不且滋來世之惑乎茲並芟削以歸核實至彭祖夏侯勝王陵諸墓雖無實據且當疑以存疑志瑩墓

周彭祖墓在七都圖經載在縣北百里久遠無據

漢王陵墓在二十二都南城岡圖經載在縣西六十里無據
夏侯勝墓在二十二都五龍峯拵軍祠後圖經載在崇禮鄉無
據

江東易王墓在崇禮鄉今名易墓豫章古志謂爲漢高裔孫
唐曹王李皐墓在邑西五十里

鄭儋墓在一都宋紹熙四年龍潭人鋤地得韓昌黎撰鄭儋墓
碑以上聶志

按彭祖商大夫封彭城王陵塚在河東夏侯勝東平人曹王
歿於襄陽昌黎碑不言葬所鄭儋葬滎陽索上舊志所載不
無附會姑存而辨其疑如此聶志

魏徵士墓在縣東四十里其母高氏墓在徵士書院東女墓在
市東汪家港北

危王塚在真隱鄉圖經有載

宋范左司墓在十五都同口按左司名璿豐城人知歐寧縣平
心率物吏民愛之遷兵部員外郎上言帝王弔伐事語剴切時
秦檜主和議璿力爭曰宰相須開懷聽天下人言安可以私意
害公議耶出知南劍州不就

贈開府儀同三司吳居厚墓御賜奮德褒賢之碑勅葬鍾陵鎮
北門金花園後奉勅改葬麻仙山以上聶志

吳居厚墓銘學士強淵明奉勅撰

元貞間氣萃彼江西異人挺出台輔攸宜昔我神聖爰相哲
艾有來吳公州里斯比國事效勤惟躬是瘁蓄其知謀卒貴
於位厥初伊何方進孤羈發策決科拔迹亨衢厥終伊何載
登廟堂大纛高牙豫章故鄉九重念公國之故老誰其綏予
自我列考熙寧之政垂裕後昆典型所重惟公其人左右朝
廷精神折衝竹帛爛然進退雍容晚歸里閭以訪舊故畫錦
煌煌謠謠載路引年抗疏屢詔弗俞奎畫雲章照耀江湖百
世所希五福純備壽考康寧如公孰繼人之云亡天不憖遺
訃奏之來當宁嗟喟衮衣繡裳一品以墜褒恤更蕃始終弗
替功名在史亦紀旂常納銘有詔以永公臧

廸功郎余天驥墓在泉嶺石岡上

羅志

眞寶章閣羅必元墓在崇信鄉楊橋

羅志

羅必元自撰墓誌銘

山人姓羅名必元字亨父世爲進賢隆興人祖俊臣父天佑
累贈中散大夫母萬氏累贈恭人妻萬氏封安人山人幼蒙
嚴父之訓力學志道年三十有六以春秋爲鄉貢首明年登
辛未進士第初任咸寧簿尉次崇仁縣丞次福州察推次餘
干知縣次兩浙運司主管文字次通判贛州除行在諸司糧
料院遷司農寺主簿知徽州改除宗學博士復知汀州前後
十一任歷仕四十餘年自顧外之民庸內之撰著無可稱紀

而僅能自立以行其志者大都不過三五事耳其攝撫之法
椽也出曾建於獄謂州郡不當以言語文字羅織人而曾竟
免其任福之察推也正姦僧之罪以謝塗汚之家而當路部
使者合薦之其宰餘干也遇府卒以無道橫加細民往往不
直於邑幾落坑穽者屢矣而僥倖全璧倖贛之日總吏束濕
凌鑠告情臺察察爲總吏繳至其書謂剝民命傷國脉六言
爲犯上劾去之主管浙漕時海砂移積潮失故道嚙齧堤岸
公私大擾當軸無策乞靈於廣信所謂天師者迎致之瞽惑
民士一國若狂謂天師真能回天地役鬼神也余謂此酒肉
凡夫耳昔佛骨惑人以死今天師惑人以生死骨可碎生身
可誅因賦長韻詩且以書達執政不報除司料纔三日有旨
奉使督餉淮西往來京口金陵備悉兩淮閉城清野之積弊
移書政府謂遣督運非計之得當依倣屯田積穀故事且耕
且戰毋自竭吾民膏血以中黠羌乾水取魚之謀又不報明
年輪對上殿復備陳守戰之策天顏溫霽謂清野委有利害
形於玉音然運轉乾坤開明日月竟無人焉尋有以諫官薦
於上者佞邪忌而擯之待次新安二年爲挾貴者攘去上念
舊人忽除宗學博士聞命卽日就道願竭駑老以報主知臺
中有儉人修私謁不從之怨論出之除守臨汀在郡逾年眼
中之丁時在言路欲肆其一網盡空之志劾罷予自是不復

有斯世之念矣嗟乎論之所執而政不立義之所急而諫不
入是有命焉操制其間而非智力之所能及尚何言哉余初
任還自湖外年四十有五知仕途險艱而不可以爲久也卽
營北谷數畝謀歸田園自開荒以至於今松竹叅天長夏無
暑中爲二亭旁引三徑遊行焉憩息焉因自號北谷山人今
余年益老矣死吾之日則不可知而葬吾之地則已結東庵
而扁安宅之堂題安宅之詩矣獨誌其墓而銘之者猶闕焉
昔唐白樂天自號醉吟先生自作醉吟先生墓誌銘余獨不
可按之以爲故事乎或謂官爵之崇卑人品之高下材器之
大小學問之淺深予何得與樂天比余聞鵬鷁異飛而逍遙

同吾姑論其趣耳況亦未必無同者樂天貪嗜山水巖壑所
過勝處窮幽極險攬擷無遺余亦喜園池亭館修竹茂林直
欲飲其光而餐其色是則同樂天自謂淫於詩天地間飛潛
動植往往皆入陶寫中余亦吟弄風月而不知手足之舞蹈
是則同樂天無子命繼以姪余亦取旁族之子以爲孫是則
同樂天嗜酒余不酒也而有茶癖樂天好琴余不琴也而有
棋癖則是二物者又足以相當樂天醉吟之餘命家僮調法
部呼小妓歌楊柳枝余無此聲樂也然晝長人靜則令二童
對奕奕罷卽使歌東波哨遍呂氏東里先生誠齋老夫歸去
長拖衫袖等雅詞田園眞樂心會意融又不知余之自樂與

樂天之樂其天者孰樂也然則樂天自作醉吟先生墓誌銘
余自作北谷山人墓誌銘或者無罪我焉爾若夫樂天文章
浩如山海蠻商番賈傳誦播流余平生所述雖多而散不錄
所存北谷集而猶未編緝其次第至若樂天外以儒行修其
身中以釋教治其心我則異於是所讀者周程朱張之書所
味者中庸大學之旨受學於真西山講習於包日菴外是無
他道也樂天諭妻子吾死日可刻醉吟先生傳一本置墓前
余今效之刻北谷山人墓誌銘於安宅堂下以詔後人爲銘
曰北谷北谷賦命也獨於道有聞於福不足也生仕宦非意
所欲一念歲寒山林松竹死吾未知葬吾已卜自誌自銘樂

天遺躅

高士樊韜墓在二十六都小石坑之南瀝洲之西阜 採訪冊

節士樊克泰墓在二十八都西羅會山 採訪冊

樊秀英墓在二十八都北山之栖鳳山 採訪冊

善士樊叔厚墓在二十七都青山 採訪冊

吳澄銘曰不求聞天所敦亡若存徵予文

元府學博章履道墓在帳幕嶺下樾樹墳 羅志

訓導章孔平墓在崇岡 羅志

節士樊明仲墓結帛招魂葬于二十八都熊動岡 採訪冊

節士樊致仲墓在二十八都梧山 採訪冊

節士樊文仲墓奉遺衣冠葬于二十八都槐樹山採訪冊

明右都御史向寶墓在潤安渡口于家下手山羅志

鹽運司提舉章光國墓在雷公渡南楊家門首羅志

善士樊積墓在二十八都濠湖山採訪冊

員外郎樊臣墓在九都菴墳山採訪冊

叅政陳謨墓在八都壺掛山

署知府章高墓在白狐峯南數里羅志

御史徐行墓在三十七都瓦溪羅志

侍郎黃宗載銘器重而華登乎廟堂驥駿而良遊乎康莊胡
嗇其年過而莫揚謂之奈何命也奚疑維善無小維官無卑

考事列辭永昭厥垂

給事中樊鑑墓在二十八都北山之陽

學士王英銘北山之陽樊氏所居偉矣伯罔美如璠璣力學

登科仕爲近臣卓爾其志能聲著聞使車南行遠歷萬里亦

旣勞勤溘爾云逝柩返故山窆於斯邱刻銘昭德永垂厥休

御史舒顥墓在金盆山羅志

御史張楷銘侃侃舒君時之特也友之益也慎以理刑愍屈

抑也斷以濟事貴誠直也精勤行部斯盜息也天不假以年

至茲極也如鳥墜霄弗盡習也如車下坂竟脫軛也歸葬故

山家咫尺也良御史之墓過者式也

贈太僕卿樊以義墓在南昌城隍寺背 採訪冊

太僕寺卿樊傲墓在新建西山石頭口 採訪冊

鄉進士樊以楫墓在二十七都青山 採訪冊

呂柟銘曰有美以楫天授孔良少肄經史傑出尋常既知董學輒舉于鄉篤行斯道問學無方當其論難如古人行天胡不壽二十九亡痛傷顏路問銘于邛鏗銘斯石百代爾章

簡討葉燦墓

副使曹時中銘惟公之世其源深長維公之德於先有光職司風教三綱五常陶鎔士類楠棖棟梁厥有成績恩命輝煌駸駸翰苑將大而昌調元贊化公器為量於乎逝矣天下實傷勒銘於墓俾後不忘

知縣趙溥墓

長史王用才銘鍾陵元老海宇名流兩任川浙治化明休一德格天九襄將周克昌後裔百福來求

光祿卿熊祿墓

楊峻銘不剛不柔厥德允修于公于古保釐匹休敷政優游百福是適于公于位于城公侯載在詩書措諸事業可傳可頌可大可久銘之貞砥以垂不朽

副使向榮墓在王家嶺楊坊山 羅志

運使樊金墓在九都菴坎山 採訪冊

知縣饒泗墓在豐城魚池口 羅志

教諭楊宣和墓

修撰唐臯銘洪都茂族推諸楊簪紱焜耀代相望亢宗有彥
吁其良發劓霜刃無鈍銛屈而弗伸胡彼蒼淑艾髦譽化已
滂壽弗稱德盡可傷佳城鬱鬱牛眠岡川迴峯抱靈且長雄
雌采鳳雙翱翔千百禩號永厥藏我銘寘道流耿光

訓導徐炯墓

卿楊峻哀詞嗚呼續溪之山兮巍巍有哲人兮賓師規賢矩
哲兮有則觴露豆雪兮多儀文葩錦繡兮蓋世科名繼美兮
當時觀風有章兮薦剡豸冠有待兮鳳池玉樓徵記兮大速猿

哀鶴怨兮傷悲

通判章泰墓在三十八都鹿岡嶺 羅志

知府饒糖墓在臨川磨刀坑 羅志

知縣楊顯墓在五都橫溪社林山 羅志

知縣王順祺墓在二十六都規橋蛇山 羅志

諭祭文曰惟爾忠義性存仁愛天錫策名巍科無忝厥職初
任于漳襄亂戮力尋歸于家斬賊著績雖左右之未承實保
障之所係欲超擢以圖報竟韜藏而不試方意音容忽聞訃
至傷悼殊深勅賜諭祭英爽不昧尚其享之

教諭陳彥章墓在雲山 羅志

墓

叅政朱憲章墓在夏婆園 羅志

布政使司江滙墓在十五都洪源渡江家山 羅志

兵部主事周思忠墓在三十三都大墳山 採訪冊

知縣江霖墓在托固橋江家山 羅志

都御史熊汝達墓在二十七都驟子山 羅志

都察院右副都御史萬潮墓

嘉靖二十四年諭祭文曰惟爾以端慎之資通敏之識早登

甲第筮仕郡推擢入春官殫心邦理憂時抗疏遭挺編氓肆

朕纘圖尋復召用部署屢遷操修益力出司學政績效尤多

洵長臬藩慎勤彌篤頃因廷薦簡拜中丞邊務倚毗聞望素

著還當別用展布謀猷胡遽淪亡齋志以歿爰推卹典葬祭

特頒爾靈如存尚其歆服

侍郎曾鈞墓在欽風鄉住溪橋 羅志

知縣饒廷錫墓在驟子岡 羅志

知縣雷志明墓在二十二都南城峯上有塘四時不涸其山皆

雷氏墳地廟祝每年祭賽必以雷氏為主先致祭于其墓而後

出神 羅志

都御史張臬墓在二十四五都鄔子蚌湖山 羅志

尚書傅炯墓在晏塘山 羅志

修撰諡文節舒芬墓在新建桃花嶺旁有諭祭碑亭 羅志

進賢縣志 卷二十三
尚書江治墓在北嶺大龜山

羅志

叅政江滿墓在十六都美厚徐湖橋

羅志

教諭江城墓在六都長陂塘象山嘴

羅志

太僕寺丞陳雲章墓在撫州波陽嶺

羅志

禮部侍郎掌國子監祭酒事萬浩墓

萬曆十三年諭祭文曰惟爾性資端慎才識通明奮起詞林

歷官宮諭育才太學勸講先朝晉貳禮卿仍司冑教懸車旣

久易簣來聞爰按彝章特頒祭葬爾靈不昧尚克歆承

知府羅希賢祖墓在泉嶺父墓在麻山獨古峽本身墓在臨川

天堂嶺

羅志

太監曾炯墓

諭祭文曰爾以篤實之資謹厚之行簡入內庭爲日已久事

我皇考克著才猷逮輔朕躬益勤啟沃敬恭朝夕裨益良多

比以年力之邁歸老田園而能不忘忠敬再入朝覲豈期還

至中道一疾而亡訃音來聞深有嗟悼茲特命工部造墳安

葬仍遣官諭祭以表朕眷念舊人之意爾靈不昧尚其歆承

侍郎饒景暉墓在三十八都鶴仙峯黃姑嶺下

羅志

諭祭文曰惟爾淵學宏才英姿偉略起家郎署晉陟臬藩兩

奉簡書教敷閩土迨膺節鉞保障西川入佐中樞克清戎務

東山需召遽爾云亡祭葬示恩偕于厥配靈其不昧祇服寵

光

尚書熊明遇墓在三十八都帳幕嶺下 聶志

太常少卿熊人霖墓在十五都羅石烏嵐山 聶志

知縣章雲龍墓在三十八都帳幕嶺 聶志

知縣江和墓在二十九都庄居前

蒼梧道饒景暘墓在南昌觀音山

侍郎饒位墓在臨川鐵爐巷

知縣江泰墓在院澤山

通判江秋時墓在北嶺小龜山

通判饒喚墓在臨川黃山

侍郎饒仲墓在白湖峯

推官朱鼎臣墓在豐城魚池口汪家山黎元寬撰墓誌

教諭朱一龍墓在臨川白竹坑

布政使司饒景暉墓在豐城魚池口

布政使司朱身修墓在臨川竹簫嶺

布政使司饒景曜墓在徐坪村旁

誥贈中憲大夫朱大齡墓在臨川沙灘橋

主事傅練墓在十五都尋岡嶺

通議大夫傅玉川墓在五龍橋

榮祿大夫傅松墓在六都河田山

奉直大夫傅瞳墓在花園幕塘范坑

知縣傅燦墓在六都河田象山

大僕寺丞傅點墓在晏塘山

奉政大夫江玠墓在徐家瀝山

南工部侍郎江正奇墓在東郭山

刑部主事江朝重墓在池頭山

贈中大夫江欽墓在四都菴山

贈中大夫江珉墓在一都朕水木林塘山

贈通議大夫張浙墓在七都郭下山

贈通議大夫張瓚墓在洪源陳坊山

治中奉政大夫張伯謙墓在七都鳳凰山

太常典簿張仲謙墓在十七都巖前山

封奉政大夫朱襲墓在臨川官坑

憲副朱徽墓在臨川官家山

通判舒瑤墓在雪山

知縣舒發墓在羅家山

以上聶志

叅政朱憲章墓在三十八都夏婆源

聶志

教授舒旦墓在危家塚

知縣舒寬墓在南陶村

侍郎朱廷聲墓在白狐南岡嶺

大學士傅冠墓在南門外山川壇仙人掌

雷州推官江昉墓在洪源渡江家山

訓導舒炳墓在二十三都藥埠前舒家山 以上羅志

徵士樊用楫墓在三十都篁山 採訪冊

知縣樊維墓在二十八都槐樹山 採訪冊

教授樊桓墓在二十八都轅門村東南 採訪冊

贈奉政大夫樊仕貫墓在二十八都楊家園住村之南 採訪冊

處士樊公黼墓在二十八都白鶴山 採訪冊

進士萬福銘曰心逸是逸跡愚非愚素履無咎允矣丈夫爰
發幽潛銘文在石昭示後來年千萬億

兵部郎中饒孟穎墓在黃家嶺 採訪冊

贈兵部左侍郎饒少峯墓在白湖峯西田內 採訪冊

贈兵部左侍郎饒裳墓在白湖峯西田內 採訪冊

贈工部侍郎饒利川墓在魚池口窰背上 採訪冊

湖廣道御史饒崙墓在卦塘山 採訪冊

工部都水司郎中饒因璞墓在交椅山 採訪冊

奉政大夫饒正派墓在三十四都馬脊岡 採訪冊

工部營繕司郎中饒元珙墓在三港口蘆林洲之陽 採訪冊

司訓饒樂溪墓在南昌灌城鄉朱姑橋西陳家山 採訪冊

國朝宮保諡忠毅傅宏烈墓在六都北嶺方圓貳拾捌丈陸尺

墓田拾畝

羅志

誥贈文

皇帝制曰鞠躬盡瘁人臣奉職之猷酬德褒庸朝廷勸忠之典蓋靖共既昭其大則哀榮必厚厥終爾原任撫蠻滅寇將軍廣西巡撫都察院右副都御史傅宏烈性行貞良才猷練達身膺節鉞服勞無忝於在官職任封疆撫綏克肩夫重寄當妖氛之跋扈抗大節而捐軀憫茲死事之忠錫以馳榮之典爰加寵秩兼賁愍綸茲贈爾爲太子太師於戲位崇百執宏敷紫誥之華寵渥九原永作黃墟之賁幽靈不昧鉅典式承

御製傅忠毅公碑文

朕惟人臣誼敦許國道矢艱貞生效力於邊疆歿捐軀於鋒刃則國家必有褒揚之典用章厥美恩至渥也爾傅宏烈忠誠素篤義憤獨昭躬迓王師效勤天末屬逆氛之未靖俾節鉞之是司厲迺同讐徂征羣醜眷言勞勩朕實嘉之詎意變起狡謀勢孤被陷志殲寇而未遂甘殺身以靡他義既從容氣何慷慨不加優卹曷示哀榮爰晉公階賜謚忠毅於戲見危授命樹大節以不回因行受各賁嘉稱而無忝勒在貞珉永垂懋典不亦休與

諭祭傅忠毅公文

朕惟節著巖疆人臣守土之義恩覃死事朝廷勸忠之經惟爾

傳宏烈識裕折衝才堪濟變屬叛臣之煽亂率義旅而來歸是
用簡任元戎擢居節鉞權膺閫外庶幾綏靖夫炎方績著行間
尚冀宣威於嶺表何圖變生肘腋醜逆辜恩遂至害及忠良隻
身陷賊矢丹心而不屈慷慨忘生蹈白刃以如歸從容就義念
茲節烈良用盡傷爰加名爵以褒揚載設几筵而錫享於戲捐
軀報國昭大義於封疆卹典宏仁慰忠魂於泉壤肆頒芬苾尚
克歆承

諭祭傅忠毅公文

惟爾志勵圖功忠能致命方著勞於粵服遽殞命於寇氛深軫
朕懷再頒諭祭於戲事上之節瀕九死而弗移卹下之恩爰再
申而加渥靈其有知歆茲嘉享

諭祭傅忠毅公文

惇崇國典頌厚澤以昭榮嘉念臣忠瞻成勞而賜卹表千秋之
偉節煥奕世之隆恩爾傅宏烈才擅理繁識能應變宣威閫外
夙奏績於巖疆奮力行間遂捐軀於嶺表抱丹忱而不屈蹈白
刃而從容惟勇烈之可風用褒揚之誕沛於戲職專守土瀕九
死而弗移寵示作忠爰再申而加渥爾靈不昧庶其祇承

贈奉政大夫饒彥昭墓在魚池口

採訪冊

湖廣驛鹽糧務道饒宇栻墓在鋪前廟東尖峯

採訪冊

知縣樊本誤墓在二十八都梧山

採訪冊

訓導樊溥津墓在二十八都社麻山 採訪冊

義塚菴在仁壽坊宋紹興間丞相趙鼎以江西干戈之後暴骨

如莽乃申明掩骼之令凡朽骼腐髑悉聚而瘞之又建菴于其

側今俱廢 聶志

漏澤園三所一南門外山川壇東一南門外蛟坑一北門烏石

山兔子岡即舊養濟院基 聶志 今廢 採訪冊

寺觀 仙釋附

自二氏之教興而寺觀徧天下加以楚俗信巫禳祥祈禱

無怪乎小民之奔走恐後殫財力而奉之也舊志有釋仙

一門攬八人物今附之寺觀之末亦方外之游云爾

福勝寺在縣南遷南嶽廟玉版居在寺後 聶志

海智寺在縣東南白雲山乾隆丙戌知縣李升庸改東向重修

聶志

李升庸重修海智寺記白雲山之海智寺古刹也隸邑城東

隅為文廟左輔押衙壇石抗手崇真昔白玉蟾有山色凝

雲翠萬重之句可想見其槩夫何明季改寺向西舍妙麗之

湖山就陂側之坳宕於地勢為反踉於儒學為折肱於佛道

為穢雜無一可也歲辛卯予來知縣事朔望行禮之餘俯仰

憑眺心竊訝之詢諸父老僉云人文不競此其一端顧寺後

空基久屬傳宦不便改作越四年傳宦裔孫魯侯願以其基

還寺舊觀予謂事有相待機有相迎魯侯此舉得非機與事會乎亟謀於衆正其方位而易置之柱礎仍舊榱甍增新巋然煥然面目頓改於是闢高閣挹遠秀覺香爐諸峯常湖九曲竝獻奇競爽於几席之下矣且也寺因傳基表加參一稍遷而東爰卽其後建

萬壽亭一座其丹墀左右夾以朝廊局以闕門俾僚屬時叙祝釐展敬有專所焉視向之卽寺爲宮因陋就簡不大相逕庭歟工始于癸巳竣於甲午費鎊若干皆出義舉以二百年相待之刹一旦從志而動如鼓應桴非轉者機邪予爲斯寺幸且爲斯邑幸也首事者太學生楊開泰王諫董事者呂文翰皆單心瘁力于斯例得書乃醞酒而祝之曰祇樹連雲兮馨香象闕翳日兮曄煌庶民子來兮朱提黃梁惟人省括兮惟神機張錫福鍾陵兮迪爾前光

集善寺在一都汝池山

海惠寺在一都龍潭山

三德寺在二都查城山

圓通寺在二都藍田山

禪靜寺在二都楓林山

永林寺在三都金山

正悟寺在三都南陽山

護國寺在三都高城山

金山塔寺在三都石河橋南

明心寺在四都張姑山

戒德寺在四都北榭嶺東

智度寺在五都查城山

妙嚴寺在六都龍安山卽龍安寺

能仁寺在七都魏徵土讀書處

熊震能仁寺記鍾陵之脉自雄嵐來延綿四十里爲麻山仙峯志稱麻姑羽飛其上其來遠矣徐行十餘里爲壇石壇石卷石耳不足當天下稊米縣於斯城郭於斯何蓋有取爾也壇石崇巍隆重與諸山異壇石南嚮諸山皆北嚮或拱或揖或侍或奔暎三臺犄凰嶺山水奇會也且凰嶺二一者望城郭而赴衣帶以東其一下注堯城山能仁寺者殿尾於縣之北門寺於縣非魁宿頗有繫焉此其地脈固然不獨人紀招來也能仁寺夙靈著唐徵君棲息以聞先輩君子往往善護之中丞張公尚寶汪公皆始終能仁寺能仁寺以故久而不廢腴田數十畝殿宏厥可人厥後有敗無護僧亦無一善狀衣食不足貿上田上田不足貿瓦木能仁寺坵墟矣戊申末乃始乞法於我侯崑吾周公公曰可矣力清之得田二十畝山地數畝有奇然時遠物舊惟以能仁還能仁侵奪無問也衆請曰有田無屋奈何公曰然出鏹金買屋一大所實其後衆又曰有屋無僧奈何公立召雲山僧住持之且夫其害僧者衆私語曰有土有宇有僧公從衆生計備矣震日記不可已也雖然余爲記其異者衆不聞乎白刃交前流矢不救急未暇緩也暇則救之矣今邑以水火災連連如也前之視今虞有易子而食者今戶不大削粟不大貴若已異矣而民衆

進賢縣志 卷三十三
於此且將從容乎父子兄弟之外了不可了於未始有之緣
何多暇耶豈非上有作者爲之何恃而不恐乎是歲也文節
公祠成文節祠費不知幾百兩也寸木尺土皆公鍤爲之公
經度宏遠矣

梵安寺在八都侯城山

覺性寺在九都儒田山

永福寺在九都龍泉山今廢

廣慈寺在十都尚巖山

靜因寺在十都相城山今廢

明慧寺在十一都何田山今廢

普滿寺在十一都西坪山今廢

後林寺在十一都龍駒山今廢

慈恩寺在十二都新城山

程迥慈恩寺記嗚呼近世名儒賢卿號有家法德履功烈在
人未泯其第宅園圃鮮有數世不易主者而浮屠氏之居每
數千百年而不廢廢而亦有與之者儒家子弟一再傳而訟
財競產相視若仇敵者多矣而浮屠氏奉其師法合塗之人
而益親蓋分每前定謂之不由制度可乎向使儒者守文武
孔孟之餘範俾上下有宗法士有常祿民有常產則今日之
民亦三代直道而行之民也卽小喻大未嘗不嘆息於斯不
特爲慈恩論也

永寧寺在十三四都今廢

靜悟寺在十三四都今廢

以上聶志

鯉潭寺在十三四都乾隆庚申僧心觀重修 羅志

多寶寺在十三四都今廢

惠香寺在十三四都界塘山今廢

星惠寺在十五都永峯山 麾尼寺在十六都長慶山

金剛寺在十七都棲賢山即戴叔倫寓處

感慈寺在十八都武頭山 慈德寺在二十都今隸東鄉廢

金文寺在二十都今隸東鄉

法濟寺在二十一都金泉山今隸東鄉

杏林寺在二十一都修峯山今隸東鄉

祖教寺在二十二都 道濟寺在二十二都

福勝寺在二十三都 普光寺在二十四五都今廢

定香寺在二十四五都今廢 定慧寺在二十六都寶壽山

青果寺在二十七都延壽山 梵葉寺在二十八都慶寶山

吉祥寺在二十八都瓊林山今廢

利生寺在三十都今廢 以上聶志

夕照寺在三十一二都梓溪圩 羅志

崇惠寺在三十三都後明山 崇勝寺在三十四都赤城山

等法寺在三十五都今廢

崇果寺在三十四都瞿舍山 聶志 一名高橋寺康熙甲申寺僧

宗璫重修 見下碑

齊之千重建高橋崇果寺碑記自邑城出迎恩門外稍折而南復西行十五里有橋曰高橋橋西十數步有寺邑所誌崇果寺也寺鄰橋鄉里人取便又以爲高橋寺云前明萬曆時僧宗璫之祖號妙宗者自臨川之上方寺飛錫於此始而築室容膝後乃殿閣巍峩四面石墻堅緻里中胡九儀孝廉顏四大字於其楹曰古崇果寺寺之有崇果也古矣妙宗者無亦於荒烟斷壠之餘披霜露斬荆棘以復處此土也然遂以爲此地開山云易代多故守僧庸庸徒衣食以自完然而靈光巋然鐘簾無恙不可謂非衆教之垂休者遠也逮後而喬木毀傷短垣零落行路之人有嘆息者里長老乃相與迓宗璫以來宗璫者提唱三乘薰修五戒旣已住持上方號爲本師而謝綱紀之勞遽而曰祖功也吾雖老不敢以辭蓋居是寺者二十有餘年矣寺枕山舊宅汙下雖盛暑淫淫然濕處而病宗璫間時偕其徒周覽久之且准形家言議揭屋於顛顧費無所從得芳漣芳瀛者孫也起而任之曰瀛也敢不悉其所有以助之曰漣敢不竭頂踵以募於四方議已定遂擇木甃石工始於康熙甲申年某日月落成於某月日寶坊幻現龍象莊嚴見聞歡喜余常攷邑乘五鄉六十寺廢者強半寺隸欽風鄉鄉有寺十三廢者七其存者又皆歲一易僧香火不繼如崇果者僅矣書曰若考作室旣底法厥子乃弗肯

通賢集志 卷二十三
堂矧肯構嗟夫世俗人之堂構克家難言矣斯寺也有妙宗以肇之於始有宗璫以持之於既有芳漣芳瀛兩人以振之於後假設此兩人不爲僧而爲賢子弟其必嗣爾股肱藝黍稷牽車服賈以祇厥父恭厥兄也可知矣兩人者述其事俾余記余竊覽名山祖窟類多有古德尊宿以勃興於其地而載筆者又皆當世有爵位赫赫能文章之人故托之以傳余鄙陋無似奚足以方此自是後寺之沙彌後生其將有古德尊宿之勃興如名山祖窟者乎是未可量也爰誌其歲月之後先師弟之勞勩以與夫首施樂善者之姓名功德焉

崇覺寺在三十五都中岡山

聶志

崇真寺在三十六都

崇因寺在三十五都

崇梵寺在三十七都湖山今廢

崇教寺今廢

崇仁寺今廢

崇化寺今改爲鶴林寺萬厯時廷賜有五大部經紫衣幢幡魚磬

崇報寺今廢

崇聖寺在白狐峯

以上聶志

砥柱庵在三十八都

羅志

崇福寺在中城山三十八都今廢

聶志

天華庵在三十八都

羅志

崇真觀在縣南舊名太霄又名臧山明知縣黃汝亨重修

黃汝亨重修崇真觀記江右自張許兩真人華山元元之教

行而老氏之宮十居六七釋氏不敵也鍾陵寺與觀亦稱魯
衛之政邑民人多儉而惑於理俗好神其鬼而解禳祈禱之
事無日不有道教亦差勝城以內惟白雲海智寺稍稍宏厥
其宮而聚溷市巷庶幾出文明門迤而東有所謂崇真觀者
踞山麓之僻其高則香爐紫霄三臺文筆諸峯相睥睨可眺
其下則三江九曲之水所環而帶也其中則林木蒼鬱而蔚
蒼客每顧而樂之按志創自漢元鼎而山則先賢臧嘉猷所
施也有優游井一白玉蟾煉丹於此王郭諸仙瓢笠杖履而
至者代亦不乏宋乾道有戴道士登己丑進士累官尚璽卿
勅重建有碑有製我朝自嘉靖甲辰燬而後新三清祖師二
殿旁道衆廊房可三十餘舍今且剝苔蘚而頽風雨矣山田
或沒於豪而閭巷俗子弟饑則寄生飽則颺去教益以陵夷
矣不佞學宮禮先師與諸生論文之暇時過而憩焉因爲之
慨然太息曰名山仙跡耳目所未歷而荒落於兵燹荆秦之
間者何可勝道昌黎氏爲火其書廬其居之說益以扃俗士
而沉痾其疾無賴子且以爲是託宿蘧廬地則真人清淨之
居鍾陵遂不得而有之乎於是召坊里父老討其故而一新
之汰其道而淫者清其產之轉徙而乾沒者殿宇廊舍加庀
焉還舊觀而止山前峙大樹爲門而榜之曰咫尺元門月下
小坐蒼翠四落則余所創也余捐俸緩十之一而丞胡君來

貢向道有幹濟才所捐助十之三四抑亦三生夙因而千里
比肩乎工竣爲乙巳仲夏不可無記以託日月本觀四至山
塘人丁產糧列碑陰

一觀基北計直二十丈橫三十丈東至民居滴水西至本觀
山門前空地南至李宅山北至民居民園爲界 一觀前案
山一段東至本觀前空地西至本觀田及萬田南至萬地北
至塘墪地計一畝五分 一觀前大塘一口東至行路西至
本觀田南至山脚地北至城墻經丈計一畝六分九釐 一
觀後元隱塘一口坐本觀山墪下面馬頸塘 一觀外地田
三號 一號坐城墻脚下直六弓橫二弓 一號相連直十

一弓橫四弓 一號坐案山西脚下計直十四弓橫六弓
一山脚地二十片 一五都油塘常住田五畝七分 一下
分灌塘祭田三畝九分 一一都鳩戲墳山一段 一五都
蛇白坑墳山一段 一四都黃鱧頭墳山一段 一南嶽墳
山一段

護福觀在三十七都泉嶺

龍泉觀在七都爲祀梅福建今廢

靈陽觀在八都

靈仙觀在十二都

太霄觀在十五都

元陽觀在十六都

南華觀在十九都今隸東鄉

興真觀在二十九都白鶴山今廢

寶慈觀在三十都今廢

紫極觀在三十一二都今廢

至德觀在三十六都今廢

麻姑觀在四都今廢

三摩庵邑治西門外萬厯間邑舉人羅文璫捐地爲庵

黃汝亨三摩庵記西門外故無觀寺羅孝廉文璫有隙地生平嗜善願捨之爲庵惟擇僧有戒行者俾守之而問名於予且堂房湫隘甚不堪容膝此地故通會城劇路車騎聲晝夜不絕淨攝好修者未必樂居此里人又多不解佛理余曰卽喧處寂作不解之解以象教爲導師政不可以無庵乃題之爲三摩蓋取楞嚴從聞思修入三摩地語也何以故有法未聞譬如聾人立鐘鼓下無有鳴處聞而不思如膏梁子不問菽麥思而不修如說食畫餅終不得飽三者無一盡日行毒霧中不見日月是故此庵名爲三摩三摩之地車塵馬足之地當無二觀聞不聞思不思修不修之間而已孝廉君與諸父老皆曰善請書所題以導居鍾陵城而不知由西門出者命僧普慶居之慶稍稍解佛事有戒行樊參之鵬甫劉學士幼安夙稱其人與之遊不虛也庵前爲山門門以內爲觀音大士堂旁兩廡一爲香積厨一爲學徒焚誦所又兩廡可待客僧樹下宿者厯堂而入爲佛殿殿旁爲僧舍二其後捲一楹爲準提堂旁二廡亦可容僧衆飯庵三面皆曠野茂樹高與高宗嶺相望而右一徑與玉版通亦城西勝地也工越於

庚子秋七月二十六日以乙巳春而竣凡事成難而毀易從善如登從惡如崩予行矣故不可以無記四至鑄碑陰

按四至東至章宅山西至官路南至章宅空基北至楓樹經直丈四十四弓後橫十二弓中橫十九弓前橫十五弓實積二畝五分六釐五毫

五印庵邑治西五里萬厯邑人陳應元建

李光元五印庵記五印庵地故五里墩自港東南詣縣十有五里而曠行旅罷且警惡得墩有里鼓路鐸焉萬厯末蜀僧曰朗然始乞車氏山建觀音堂道左而去取施水飲而已歲在丁未金陵僧海廣主施飲事有拓焉之志與鄉士大夫謀

重之以邑宰官而後乃今鬱然庵也鍾陵之生民也瘠廣爲之制儉而節舒辛亥佛殿成庵始得命名癸丑諸法相寶坐畫飾今上壬戌官廳及大門作而工訖焉大門三間大方堂茶房翼之門立然後觀音堂尊而新殿邃殿後爲學事堂前左廂爲齋堂右廂爲三官殿經三官側而南爲官廳並觀音堂右步廊疑軒左扉自闕亦一規也廳之墀右觀音堂之墀左僧舍厨庫畢具與大門之兩翼皆側出東西向制雖儉曲而裕焉廣之始至也卽之山樹藝北東西餘地少其楹足蔽衛而已南盡山麓廣三之林木茂密多松粘官道抱門闌下切茂林而過令人有睹清涼山林意當門娑羅二株其葉迤

覆隱其枝幹形色如紺佛頂羣松爲僧媚焉其樹本西域產
峨眉天臺匡廬諸名山有之種皆自峨眉而廣乃得之鳩戲
水濱足異也迺若陵夷四眺西脫原巘弛然而長東望郊牧
蔚然而深前峯千里後流百折祇林若獨涌然其寓高於平
者乎廣與車氏約畫林木而守林外茶圃菽麥地若干畝乞
予記其本末以詔永久且風後之能施舍者廣出家自天界
叅預講席頃以遠遊至援止之而遂不愛其力於此夫梵宇
之盛也崇者夸國都深者絕人境何可勝數卽廣近歷吳楚
諸黃金界視五印何足覆一瓢然而幽探窮索祇奔走天下
而無一所濟於見前之犇走者君子惑焉五印當衝邑修途

之會百里九十之際與罷者爲里鼓警者爲路鐸日覺衛人
而人去之若流水焉是謂至道然則賢於名嶽奧區瓊樓玉
城遠矣以廣其才嚮使必重繭極目闢幽勝建非常業而後
以爲愉快是坵垤者惡足以繫之哉廣之觀固在此不在彼
當其少猶說法都下居鍾陵二十年未有聞其語者與臃腫
偕作而已意者其斷學時也前是壬子余使蜀過里榜其殿
取鹿鳴之示我周行壬戌自日講賜告則廣徙其榜於大門
內余相視以懌天何言哉四時行焉謂井井者貿貿者乎是
建也先後作募緣疏命庵名凡三陳子今觀察公應元永明
令君維泰孝廉君維恭勤於記成事者朗然實啟山林雖不

知其人名亦永焉

青蓮庵在邑治東十五里 以上聶志

眞君廟在二十三都梅莊市 羅志

萬福庵在二十三都 羅志

梅王廟在二十三都五龍岡今廢 羅志

圓覺庵在三十七都 聶志

甘露庵在邑治東棗樹鋪萬厯間知縣錢士貴題 聶志

小淇園庵在水西門外 聶志

千佛庵在文明門外古眞如山明時傅冠李輔捐地爲庵 採訪冊

太平庵在縣北四十里九都 採訪冊

水月庵在二十八都大梧山相傳明太祖與僞漢陳友諒戰經其地渴甚太祖拔劍插地泉隨湧出左清右濁清以飲兵濁以飲馬因名其地爲湧泉套嘉慶甲戌里人卽其地建菴題曰水月 採訪冊

蓮華庵在二十八都一圖明董元宰題其額曰選佛場 採訪冊

僊釋附

漢洪崖先生得道居西山洪崖有煉丹井或曰卽黃帝之臣伶倫或曰帝堯時已三千歲矣有衛度世者當漢武帝時入華山尋其父叔卿叔卿在絕壑中與數人博度世問爲誰曰洪崖先生與許由巢父也竟莫詳其本末云隋開皇中以洪崖所在改

郡名爲洪州按洪崖曾煉丹邑之瑞洪經洪源渡駐息

晉施真人諱岑字太玉本沛中壯士祖朔仕吳因從居九江焉
岑形容甚偉善弧矢精劍術許君初斬海昏巨蛇會壯士三百
人與俱岑功爲上因懇爲弟子嘗煉丹於邑之白鶴山今與真
觀有丹井存焉寧康二年乘蒼虬上仙

唐貫休字德遠鍾陵人俗姓姜氏隱婺之蘭溪和安寺賜紫衣
號禪如太師有禪月集三十卷詩與曹松方干同名於時嘗以
詩謁錢鏐不偶復入蜀謁孟知祥禮遇甚厚有臨高臺詩云凜
風吹遠念使我升高臺寧知數片雲不是舊山來故人天一涯
久客殊未回雁來不得書書寄空聲哀其詩多存殆磊砢有激
而逃禪者

文簫鍾陵人瀟酒美丰儀喜音律樂山水西山有遊帷觀每至
仲秋車馬喧闐十里若闐闐豪杰多召名姝善謳者夜與丈夫
間立握臂連踏而唱簫往觀觀一姝甚妙歌曰若能同步陟僊
壇應得文簫駕綵鸞自有繡襦並甲帳瓊臺不怕雪霜寒生意
爲神仙停立不去姝獨秉燭穿大松逕將盡陟山捫石冒險而
升生躡其踪姝曰是文簫耶相引至絕頂石室中張設甚盛有
吏持簿白事鸞處分去生再三問故鸞不得已告以江湖覆溺
事忽風雷裂帷覆几俄有仙童持天判曰吳綵鸞以私慾洩天
機謫爲民妻一紀姝乃與生下山至江城寺步門外紫極宮寓

焉無以自給令生具紙筆寫唐面韻鬻之錢盡復書越十二年
夫婦各騎虎昇山去按鸞乃吳真人猛女所寫韻乃硬黃非墨
也今爲世寶云

宋施真君名肩吾字希聖分寧人以元和進士隱西山著西山
集五卷羣仙會真記五卷嘗煉丹英山之麓後人創靈陽觀祀
之丹井至今猶在

白玉蟾踪跡傳瓊州又傳武夷無可考然別號海瓊則多出粵
人也邑崇真海智之間杖履輒憩又嘗煉丹優游井玉蟾於鍾
陵不但蘧廬宿也

王郭二仙相傳因尋浮邱公寓邑之崇真觀往來麻山也大中
祥符間道士吳元慶初觀祀之按真君一名道想一名道意皆
王姓以雙乳一出養於郭因冒其姓晉時以春秋舉不第遂隱
修真成道於華蓋山師浮邱公羽流言是黃帝時人按史浮邱
伯乃漢初人爲卜子夏門人通詩

包真人不知何時人卅角時觀異人授以道術且囑曰麻峰洞
天汝得道飛昇處也亟圖之真人遍遊因至邑麻姑壇之前楹
憩之山幽境僻遂樂依焉自稱包道者詰其名則笑而不答遊
嬉間輒指揮風雨一日鄰婦爲真人補衲忽陰雲四起婦曰豆
在場雨必漂投衲去道者止之曰無慮也乃持帚繞場掃之雨
隨至四旁水盈尺場獨燥自若豆果不漂玉蟾子過麻峰與道

者會龍井上論金丹火符道者云水就濕火就燥皆自然之理玉蟾曰明珠也殆無爲而得乎因貽之以歌有待吾了却人間事然後相從面紫羅之句道者常照水以泥塑像謂觀主曰類我否曰然值歲旱乃命羣兒捧迎取龍挹井水雨沛注禾乃登一夕異香襲人天樂作觀主驚異往觀道者已乘雲騰矣衲履遺井側觀主取而藏之忽失去每風清月白之夕輒聞鐘磬聲後凡歲旱則迎道者像取水龍井以雩仍應

白鶴道人梁時常寓邑東鰲極結一小庵今廢址猶存雷道人嘗修煉於金山後昇舉覘之者時見有紫氣冉冉

戴道士者不知何許人相傳住邑崇真觀登乾道己丑進士第累官璽卿奉勅重建厥觀今南門常豐倉卽戴家祖基云

明楊節譽龍偉五世孫十九都小塘人幼有仙氣禱雨場輒應天順間差御史訪竒事江西以節譽聞召入上御奉天殿試法教指揮雲雨捷於影響竒之賜帶奉錦衣衛指揮使不受封以真人又不受嘗自咏曰三朝鶴序班聯肅九度龍顏面問竒後羽化去

釋善信號巖陽尊者初叅趙州問一物不將來放下箇甚麼趙州曰放不下擔取去善信大悟唐天祐間杖錫來遊居邑之明心寺踞坐蟠石嘗有一鹿一蛇馴繞左右及沒建塔於寺之西宋淳化間啟其塔髮垂至踵指甲過臂

玉丹和尚寧藩癩仙所供奉也後避宸濠之暴栖真玉丹觀中
得道解化有遺像歲旱祠以雩每有驗 國朝宏敏字穎學天
資高朗機鋒迅徹而隨分接引多所拯拔嗣博山雪關和尚法
天界浪杖人以祖席屬師提唱師堅謝不就種田博飯隱居介
岡之燈社及奉新蘆田字畊菴老人刻有語錄詩文多種行世
與學憲黎公元寬都科朱公紱饒公宇栻相友善咸敬禮焉法
嗣傳繁號亦菴能紹師法尤爲禪林拔萃之器

進賢北山有雷丐者其名人呼爲雄雞蛋丐甚喜因自名之每
行丐必擇善良之家非其人弗入少與卽去不奢求不多事飽
則瞑目端坐嘗有客過周司準遺白金八十兩丐拾之詫曰誰
堪此 耶逐日守候已而客至問乃核實而還客請中分不受
飄然而去不知所終

Blank columns for text within the main frame.

